

ARREST DE LA COUR DE
*Parlement, portant defences aux Musniers &
 Propriétaires des Moulins, de tenir leursdicts
 Moulins autrement que hors la vore navigable,
 & à eux enjoinct de laisser vne espace de huit
 toises de largeur en droit fil & parfond du cours
 de l'eau, & iceux moulins tenir cul à cul, suiuant
 les reglemens cydeuant faits par la Cour, à peine
 de quatre cens liures parisis d'amende contre
 les contreuuenans, dont sera faiect proces
 verbal par le premier Sergent sur ce
 requis, assisté d'un Baliseur de
 ladite riuere.*

LOVIS, Par la grace de Dieu, Roy
 de France, & de Nauarre : Au
 premier des Huissiers de nostre Cour de
 Parlement, ou autre nostre Sergent sur
 ce requis, Salut, Comme le iour & datte
 des presentes, veu par nostredite Cour la
 Requête présentée par la Cômunauté
 des Marchands frequentans la riuere de
 Loire & autres fleuves descendans en
 icelle, tendant à ce que suiuant & con-
 formément aux Arrests des 28. Aoust

1552, 22. Aoust 1554. & 27. Iuillet 1555,
iteratifues defenses fussent faites à son de
trompe & cry public sur tous les ports &
autres endroits de lad. riuere & fleuues
où y a moulins à bac & foraine flottant
sur icelle, tant aux proprietaires d'iceux
moulins à bac & foraine flottant, qu'à
leurs gens, Seruiteurs, Musniers, & tous
autres tenans & exploitans lesdits mou-
lins, de ne les tenir & mettre à l'endroict
du plus profond & au droict fil & cours
de l'eau, sur les peines portées par les
Edits & Arrests, & qui leur fust enjoint
d'oster ceux qui y sont, & laisser libres &
franches huit toises de voyes en largeur
d'eau, de droit fil, au cours plus profond
desdites riuieres, entre chacun moulin,
& de moulin en moulin mettre iceux,
& tenir cul à cul l'un de l'autre, de ma-
niere que la voye nauigable demeure
touours libre, franche & droite, de lar-
geur desdites huit toises, au droict fil &
plus profond du cours de l'eau: autre-
ment & à faute de ce faire, que les sup-
plians pourront ranger & mettre hors la
voye nauigable, aux frais & despens des-

C. 50

F

39

32

163

Sp

Edits Propriétaires ou Musniersestans esdits moulins, dont seroit dressé proces verbal par vn de nos Sergens, assisté d'un Maistre Balizeur de ladite riuere. Et en cas de contrauentions, qu'il sera permis aux supplians faire proceder par saisie reelle & actuelle, & establissement de Commissaires, & enjoindt de faire bail à ferme desdits moulins, saisis pardeuant le plus prochain de nos Iuges des lieux, pour les deniers prouenans de la ferme estre conuertis & employez aux balizemens & netoyemens de ladicte riuere & fleuues, & au remboursement des frais desdits déplacemens, ensemble de ladite saisie. Defenses, tant ausdits Commissaires qu'à ceux qui exploiteront lesdits moulins de leslaisser en la voye nauigable, sur les peines portées par nos Edits, Ordonnances, Arrests, & Reglemens de nostredite Cour, & mesme de respondre en leur propre & priué nom, en cas de naufrage, de leurs dépens, dommages, & interests, enuers les interessez. Et en cas d'opposition, que les oposans seront tenus prendre autre permissiõ des Iuges

des lieux, que celle qui leur sera donnée par nostredicte Cour. Lesdicts Arrests,, conclusions de nôtre Procureur general, & tout confideré; Nostredicte Cour a ordonné & ordonne, que les supplians auront commission, pour faire appeler en icelle qui bon leur semblera, aux fins de ladite Requête. Ce pendant, sans prejudice des droits des parties, a ordonné & ordonne que lesdicts Arrests seront executez selon leur forme & teneur. Fait defences aux propriétaires des moulins qui sont sur lesdites riuieres, leurs Fermiers, Musniers, Seruiteurs, & tous autres d'y contreuenir, à peine de quatre cens liures parisis d'amende, & de tous despens, dommages, & interests. Si te mandons à la requête desdits supplians, mettre le present Arrest à execution, selon sa forme & teneur: De ce faire te donnons pouuoir. Donné en nostre Parlement le xj. Avril, l'an de grace 1631. Et de nostre regne le xxj.

Signé, Par la Chambre, RADIGVES.
Et scellé de cire jaune.